

Dithero tsa Tirelano mo Kutlwanong

41/2013 Thero ka Sontaga wa 11 morago ga moletlo wa Borarobongwe/Trinitate, e le ka 11. 08. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 388 - 355/363
2. **Thapelo:** Modimo Rraetsho wa legodimo, re lebogela sebaka se se molemo seno sa Trinitate, gonne mo sebakeng sotlhe sa sone re rutwa, le go lemosiwa dithuto le ditiro tse dikgolo tse Morena a di re diretseng ka ntlha ya pholoso ya rona. Ke gona re kopang Mowa o o Boitshepo wa gago gore o re sedifatse, re tle re tlhaloganye la gago le le tlang go rona ka melomo ya barongwa ba gago, le go fetisetsa molaetsa wa lone go bakaulengwe ba rona. Morena, kabolola ditsebe, le go bula ditlhaloganyo tsa rona ka gale gore re nne bautlwi le badirisi le badiragatsi ba Lefoko la gago. Re kopa jalo ka Jesu Keresete, Morena le Mopholosi wa rona. Amen.
3. Epistolo ka fa thulaganyong ya 2 e kwadilwe mo go Baefeso 2:4-10;
Efangele ka fa thulaganyong ya 1 e kwadilwe mo go Luka 18:9-14.
4. A go ipolelwe tumelo ya bokeresete!
5. Sefela sa 176 - 159/166
6. Thapelo ya mmadi wa thero.
7. **Efangele** ka fa thulaganyong ya 5 e kwadilwe mo go Luka 7:36-50, e re: "Jaanong mongwe wa Bafarisai a mo kopa gore a je nae. Jesu a tsena mo ntlong ya gagwe, a nna fa dijong. Mme bonang mosadi mongwe wa motse yo e leng moleofi a utlwa gore o ntse fa dijong mo ntlong ya Mofarisai, a tsisa setlolo ka modutwana wa alabasetere, a ema ka fa morago fa dinaong tsa gagwe, a lela, a simolola go kolobetsa dinao tsa gagwe ka dikeledi, a di phimola ka moriri wa gagwe, a nna a mo atla dinao, a di tlotsa ka setlolo. Ya re Mofarisai yo o mo laleditseng a bona jalo, a ithaya a re: 'Yo, fa e ka bo e le moporofeti, a ka bo a itse gore mosadi yo o mo amang ke mang, le gore o ntse jang; gonne ke moleofi.' Jesu a tswa molomo, a mo raya a re: 'Simone, ke na le lefoko nao.' Ene a re: 'Moruti, bua,' Jesu a re: 'Batho ba le babedi ba ne ba tsere molato mo moadiming mongwe, wa ntlha a le molato wa diranta di le 50, yo

mongwe wa di le tlhano. Mme ya re ka ba se na sepe se ba ka lefang ka sona, a phimola molato wa bona ka bobedi. Jaanong yo o tla mo ratang bogolo mo go bone ke ofe?' Simone a araba a re: 'Ke gopola gore e tla nna ene yo a mo itshwaretseng go le gogolo.' Jesu a mo raya a re: 'O athotse sentle.' Jaanong a retologela kwa mosading, a raya Simone a re: 'A o bona mosadi yo? Ke tsenye mo ntlong ya gago, mme ga o a ka wa mpha metsi a go tlhapa dinao; mme ene o nkolobeditse dinao ka dikeledi, a ba a di phimola ka moriri wa gagwe. Wena ga o a ka wa nkatla; mme ene, fa e sa le a tsena ga a ise a ke a khutle go nkatla dinao. Tlhogo ya me ga o a ka wa e tlotla lookwane; mme ene o ntlotitse dinao ka setlolo. Ka ntlha ya moo ke go raya ke re: Dibe tsa gagwe tse di leng dintsi o di itshwaretswe; go bonala jalo, ka a ratile go le gogolo; mme yo o itshwarelwang go le gobotlana, o rata go le gobotlana.' Jaanong a raya mosadi a re: 'Dibe tsa gago o di itshwaretswe.' Ba ba ntseng nae fa dijong ba simolola go akanya ba re: 'Ke mang yo, yo e bileng a itshwarela dibe?' Jesu a raya mosadi a re: 'Tumelo ya gago e go pholositse; tsamaya ka kagiso!'" Amen.

8. Thero: Phuthego, fa re lebelela thulaganyo ya lenaneo la rona la ngwaga wa kereke, re bona setlhogo sa letsatsi se re: Modimo o itshwarela ba ba ipobolang dibe tsa bone ka boikokobetso. Etswe temana ya beke yone e re: Modimo o ganetsa ba ba ikgogomosang, mme ba ba ikokobetsang o ba naya boitshwarelo, 1 Pet. 5:5.

Bagaetsho, tota bontsi jwa rona re batho ba ba batlang maemo a a kwa godimo. Ke gore maemo a tlotlo gore re tle re tlotliwe ke batho. Etswe rona bakeresete re ka bo re tsere sekao sa Morena wa rona Jesu Keresete. Jaaka moapostolo Paulo a ruta jaana a re: Boitlhomong jo bo tshwanetseng go nna mo go lona ke jo bo reng bo le mo go Keresete Jesu le ene, yo e rileng a le mo tshwanong ya Modimo, a se ke a kaya go tshwana le Modimo jaaka thopo, mme a ikamoga ka go tshola tshwano ya motlhanka, a nna jaaka batho, a fitlhelwa a tshwana le motho ka maitsholo, a ikokobetsa ka go nna yo o utlwang go ya losong, e bong loso lwa sefapaano, Bafil. 2:5-8. Seo o se dirile gape, fa a ne a tlhapisa barutwa dinao, Joh. 13:1-15. Ke fao re boneng Peto e ene a gana, ka ge a itse, fa tiro ya go tlhapisa dinao e le e e dirwang ke balhanka, Gen. 18:4, e seng ya batlotlegi.

Bagaetsho, mo Efangeleng ya Lefoko la thero ya kajeno re utlwa gore Morena Jesu o ne a lalediwa ke Simone yo o neng a le mongwe wa batlotlegi wa Bafarisai. Jesu ga a ka a gana, etswe Simone e ne e le mongwe wa batho ba ba ikayang ba siame, e bile ba tlotlega fa pele ga batho. Re utlwa gape ka ga mosadi mongwe yo go tweng e rile a utlwa jalo, le ene a ya kwa ga Simone, a feta a nna fa dinaong tsa ga Jesu, a tshotse modutwana wa mafura a alabasetere, a

simolola go lela, le go tshela dinao tsa Morena Jesu ka dikeledi, le go di phimola ka moriri wa gagwe, a be a di tlotsa ka mafura, setlolo se a se tshotseng ka modutswana, a re utlwang go twe a ne a rekwa ka madi a mantsi, foo monko wa sone o neng wa tlala ka ntlo yotlhe. Seo sa dira gore monna wa mosiami a ngongorege ka pelo, a re: Fa Jesu o ka bo a itse gore mosadi yo ke mang, le gore ke moleofi, o ka bo a sa mo letlelele go dira jaaka a dira jaana. Ene o ne a sa itse gore Jesu o tlhaloganya botenye jwa dikakanyo tsa pelo ya motho, motho a ise a bue sepe. Jesu a bona seo; a mo tseela setshwantsho ka batho ba babedi, ba ba neng ba ya kwa moadimising wa madi. Mongwe a adima R 50.00c yo mongwe ene R 5.00c. Fa ba tshwanetse ke go busa madi ao, bobabedi ba palelwa ke go a busa. Foo mong wa one o tshwanetse go ba tseela dikgato. Mme go fetsa molato ke gore go rekisiwe tsotlhe tse ba nang le tsone gore molato o phimolwe. Ka bobedi jwa bone ba nna pelongwe fela, ba ya kwa moadimising wa madi, ka boikokobetso jo bogolo le ka sello. Foo re bona monna yo o pelotlhomogi, yo o kutlwelobotlhoko o phimola molato wa bone ka bobedi ka go tswana, a re: Go siame, ga lo sa tlhole lo na le molato le nna. Foo ga rena boitumelo le boipelo mo go bone. Matswalo a se tlhole a ba latofatsa. Simone fa a bodiwa gore ke ofe wa ba babedi ba yo o tla mo ratang, a re: Ke yo o itshwaretsweng go le gogolo. Ka selekanyo sa lorato lo logolo lwa mosadi yole ga bonala gore o ne a itshwarelwa maleo a le mantsi, mme Simone o ne a gopola gore o ne a sa itshwarelwe mo go kalo.

Phuthego, tse di sa ntseng di diragala le mo go rona. Gonne jaaka banna ba babedi bale, le rona re tswana le bone. Re molato jalo fa pele ga Modimo. Ga re na sepe go duelela molato wa maleo a rona. Gonne rona ka fa tlhagong ya rona re tsetswe re na le boleo jwa tlhago, mme e bile re na le jo bo dirwang. Gape fa pele ga Modimo maleo otlhe a a tswana, a lekana ka bogolo le ka kotlhao. Lefoko la Modimo le re: Tuelo ya boleo ke loso. Ke gore petso le bogale jwa Modimo di re tshwanetse, ga go ope yo o ka tilang. Jaaka moapostolo Paulo a bua jaana a re: Ka moo he, boleo bo tsenye mo lefatsheng ka motho a le mongwe le loso ka boleo, mme loso lwa phololela mo bathong botlhe, ka botlhe ba leofile, Baroma 5:12. A be a bue gape a re: Ga go ope yo o siameng, le e seng a le mongwe fela. Ga go ope yo o tlhaloganyang, ga go ope yo o batlang Modimo. Ba fapogile mmogo ba tlhobosegile, ga go ope yo o dirang molemo, ga a yo, le e seng a le mongwe fela, Baroma 3:10-12. Tota le ene Simone wa Mofarisai, ke moleofi yo mogolo fa pele ga Modimo. O tshwanetswe ke petso ya loso, fa a sa ikokobetse fa pele ga Modimo ka ntlha ya maleo a gagwe, a kopa boitshwarelo jwa maleo mo go one.

Rotlhe re siamisiwa fela ka boitshwarelo jwa ona ka kgololo e e mo go Keresete Jesu, yo Modimo o mmeileng go nna thuanjo ka madi a gagwe e e bonwang ka tumelo, Baroma 3:22-25. Ke gona ka moo re utlwang, le Morena a raya Simone a re: Le mosadi yo, yo e leng moleofi yo mogolo, dibe tsa gagwe tse di leng dintsi, o di itshwaretswe, ka ge go bonala jalo, ka ge le ene a ratile go le gontsi, mme yoo o itshwaretswe go le go botlana, ka a ratile go le go botlana. Phuthego, fela jaaka re utlwa ka ditsala tsa ga Simone, le mo go rona go teng ba ba sa dumeleng gore Modimo o neile badiredi ba gagwe thata go itshwarela dibe. Ba a ngongorega, fa mongwe a tlotse nngwe ya ditaolo, a be a tla go kopa boitshwarelo. Bao ba a reng ka mafoko a a mo go Joh. 20: 22-23. Bao ba lebala le Lefoko la moapostolo Paulo le le reng: Ke ka moo re leng barongwi mo boemong jwa ga Keresete, ka Modimo o kgothatsa ka rona, re rapela mo boemong jwa ga Keresete, re re: Ineeleng go ruangwa le Modimo, 2 Bakor. 5:20. Le Kategisima ya rona e nne e bue jaana, e re: Yo o nang le boitshwarelo jwa dibe, e bile o na le botshelo le phologo ya bosakhutleng. Ka moo Balutere ba bantle, a le rona re se ikgobokanyeng, re atamele mo boipobolong ka pelo yotlhe gore morwalo o o boima wa maleo a rona a tle a imololwe ke Morena, jaaka a diretse mosadi yole wa moleofi, re ikopele boitshwarelo ka metlha, re be re dumele, fa ruri dibe tsa rona di itshwaretswe ke Modimo ka madi a Morwa ona Jesu Keresete. Ka re itshwaretswe go le gogolo, a re rateng go le gogolo! Amen.

9. Thapelo: Morena Modimo Rraetsho yo o rategang, re a go leboga, ka o re diretse thuanjo le kgololo ka madi a ga Morwao Jesu Keresete yo o neng a dirwa boleo ka ntlha ya rona. Le wena Jesu Keresete, re a go leboga, ka o sa ntse o re laletsa le mo sebakeng seno sa rona o re: Tlaang lotlhe, ba lo lapileng, ba lo imelwang, ke tla lo lapolosa. Morena, o re lapolose ka boitshwarelo jwa gago gore le rona re tle re gorogele kwa o leng teng, kwa legodimong la gago, kwa re baakanyeditsweng manno teng ke wena ka loso le tsogo ya gago. Morena Jesu, re a go leboga. Amen.

Thapelo ya Morena: Rara wa rona yo o mo legodimong ...

10. Sefela sa 168 - 150/153

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke T. Ratshefola, ka ngwaga wa 2001/2007.
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.